

02.11.2021

UKA2021/51

Inatsisartut aalajangiiffigisassaattut siunnersuutigineqarpoq, Naalackersuisut peqquneqassasut pisortanit ikiorsiissutit pillugit allannguuteqaqqullugit, taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikiorsiissutinik ikiorneqarsinnaangortillugit, kræfteqarlutik nappaateqarnertik ilutigalugu katsorsagassanngoraangamik nalinginnarmik akissarsionnertik unikkallaraangat sulisinnaajunnaarnertik pissutigalugu. Nalunaarusiami erseqqissarneqassaaq ajornartorsiut qanoq isikkoqarnerseq aammalu qanoq ikiortarialiunersut taamatut pisinnaatitaaffilissapata. Nalunaarusiaq juli 2022-mi kingusinnerpaamik saqqummiunneqassaaq.

(Inatsisartunut ilaasortaq, Erik Jensen, Siumut)

Inatsisartunut ilaasortap Erik Jensen Siumut oqaluserisassanngortitaanut Siumumiit imatut oqaaseqassuugut.

Siunnersuuteqartup siunnersuutaa asuliinnaangittutut Siumumiit isigaarput. Nammineerluni inunnermi pingaartillugit allanillu isumalluuteqarpallaarani pilersikkusussimasat ajoraluartumik nappaassuarmik eqqorneqarnermi annaaneqarsinnaasarput.

Nappaassuaq Kræft akiorniarlugu qujanartumik iliuitsit suliniutillu assigiinngittorpassuit ingerlapput ilaatigut eqqornerlunneqartut kattuffinniik aningaasatigut tapersorneqarsinnaalernikuullutik.

Peqqussut innersuussutaasoq misissoraanni ikiorsertariaqalersimasunut assigiimmik pinniffiusinnaanera takujuminaappoq. peqqussummi allassimavoq;

”§ 3. Kinaluunniit Kalaallit Nunaanniittoq tassanngaannartumik pisariaqavissumik pissaaleqilernerme pisortanit ikiorserneqartussaataavoq, tamatumani imminut ilaquuttaminillu pilersuisinnaangikkuni.”

§ 4. Pilersuinermut akiligassanullu aalajangersimasunut kiisalu immikkut ittumik pisoqartillugu pisortanit ikiorsiissutinik pisinnaanermut piumasaqaataapput qinnuteqartup Kalaallit Nunaanni najugaqartuunissaa inuillu allattorsimaffiannut nalunaarsimanissaa makkuninngalu naammassinnissimanissaa.”

Naalackersuisut akissutaani oqaatigineqarpoq nappaammik eqqorneqartut ikiorneqarnissaminnik pisinnaatitaasut. Tamanna ilumoorpoq. Kisianni siunnersuuteqartup peqqussutikkut ersarissaasoqarnissaanik siunnersuuteqarnera pisariaqavittutut Siumumiit isigaarput. Peqquutilimmik akiliisinnaajunnaarallarnermi imaluunniit nammineq inigisami illuutigisamiluunniit



pinngittoorneqarsinnaanngitsumik ajutooruteqarnermi pisortanut
qinnuteqaraanni itigartitsikkajuttoqartarpoq.

Pisortanit ikiorsiissutit aaqqissuuteqinneqarniarput. Naalakkersuisullu
akissutaatuut oqaatigineqarluni illumik namminneq piginnittunut tapiissuteqarsinnaaneq
periarfissaqartitsissasoq.

Siumumiit nammineerluni illutaarniarsinnaaneq tunuarsimaarfigineqassanngitsoq
isumaqarfigaarput.

Naalakkersuisut aamma akissutaanni nassuiaasiortoqartariaqarnissaq pisariaqanngitsutut
taaneqarpoq.

Kisianni, Siumumiit inatsisartut peqqussutaata misissornerani ullumikkut ikiorsiisarnermi
tunngavigineqartut siunnersuuteqartoq assigalugu erseqqissaasoqarnissaa kissaatigaarput.

Taamatut oqaaseqarluta Ilaqutariinnermut peqqissutsimullu ataatsimiitsitaliami
nalornissutaasinnaasunik qulaajaasoqarnissaa siunertaralugu aappassaaneerineqartinnani
suliarineqassasoq inassutigaarput.

Jess Svane, Siumut